



სახელმწიფო შესყიდვების
სააგენტოს თავმჯდომარის
გ ა ნ კ ა რ გ უ ლ ე ბ ა



KA080143395359819

№ 2066

30 / აპრილი / 2019 წ.

შპს „ლდ. გროუპის“ გაფრთხილების შესახებ

შემსყიდველი ორგანიზაცია: ვანის მუნიციპალიტეტის მერია;

ტენდერის ნომერი: NAT180011813;

შესყიდვის ობიექტი: 45200000 – მთლიანი ან ნაწილობრივი სამშენებლო სამუშაოები და სამოქალაქო მშენებლობის სამუშაოები;

მიმწოდებელი: შპს „ლდ. გროუპ“ (ს/ნ: 445469207);

წერილობითი შეტყობინების საფუძველი: სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულება.

აღწერილობითი ნაწილი

1. ადმინისტრაციული წარმოების დაწყება

1.1. სახელმწიფო შესყიდვების სააგენტოში 2019 წლის 29 მარტს წარმოდგენილ იქნა ვანის მუნიციპალიტეტის მერიის 2019 წლის 29 მარტის № 20/1181 წერილობითი შეტყობინება (რეგისტრაციის № 3486), რომლითაც სააგენტოს ეცნობა შპს „ლდ. გროუპის“ (ს/ნ: 445469207) მიერ NAT180011813 ელექტრონული ტენდერის საშუალებით დადებული 2018 წლის 7 სექტემბრის №174 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. სააგენტომ შპს „ლდ. გროუპს“, სახელმწიფო შესყიდვების ერთიან ელექტრონულ სისტემაში მის პროფილში მითითებული ელექტრონული ფოსტის მისამართის ld.levani@gmail.com მეშვეობით, 2019 წლის 2 აპრილის № 1337 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე წერილობითი განმარტების წარმოდგენა.

2. შემსყიდველი ორგანიზაციის პოზიცია

შემსყიდველი ორგანიზაციის წერილობითი შეტყობინების თანახმად, მიმწოდებელს, 2018 წლის 7 სექტემბრის № 174 სახელმწიფო შესყიდვის შესახებ ხელშეკრულების საფუძველზე, ხელშეკრულების გაფორმებიდან 2018 წლის 20 ნოემბრის ჩათვლით, უნდა შეესრულებინა ვანის მუნიციპალიტეტში, შუამთის ადმინისტრაციულ ერთეულში მდინარე ყუმურზე ნაპირდამცავი ნაგებობის მოწყობის სამუშაოები. ხელშეკრულების ღირებულებად განისაზღვრა 122 968,61 ლარი, ხოლო მოქმედების ვადად – 2019 წლის 12 მარტი. მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები და ამოიწურა 2018 წლის 7 სექტემბრის №174 სახელმწიფო შესყიდვის შესახებ ხელშეკრულების მოქმედების ვადა, ხოლო ვანის მუნიციპალიტეტის მერიის 2019 წლის 26 მარტის № 20350 ბრძანებით შპს „ლდ. გროუპს“ დაეკისრა პირგასამტეხლო 14 559,30 ლარის ოდენობით.

3. მიმწოდებლის პოზიცია

მიმწოდებელს ადმინისტრაციული წარმოების ფარგლებში განმარტება არ წარმოუდგენია.

4. სააგენტოს მიერ დადგენილი გარემოებები

4.1. 2018 წლის 30 ივლისს ვანის მუნიციპალიტეტმა გამოაცხადა NAT180011813 ელექტრონული ტენდერი მთლიანი ან ნაწილობრივი სამშენებლო სამუშაოებისა და სამოქალაქო მშენებლობის სამუშაოების (CPV45200000) შესყიდვის მიზნით.

4.2. სატენდერო კომისიის 2018 წლის 31 აგვისტოს №3 სხდომის ოქმით შპს „ლდ. გროუპ“ (ს/ნ: 445469207) გამოვლინდა გამარჯვებულად და მიწვეულ იქნა სახელმწიფო შესყიდვის შესახებ ხელშეკრულების გასაფორმებლად.

4.3. 2018 წლის 7 სექტემბერს მხარეთა შორის გაფორმდა № 174 სახელმწიფო შესყიდვის შესახებ ხელშეკრულება, რომლის საფუძველზეც, მიმწოდებელს, ხელშეკრულების გაფორმებიდან 60 კალენდარული დღის ვადაში (2018 წლის 6 ნოემბრის ჩათვლით), უნდა შეესრულებინა ვანის მუნიციპალიტეტში, შუამთის ადმინისტრაციულ ერთეულში მდინარე ყუმურზე ნაპირდამცავი ნაგებობის მოწყობის სამუშაოები. ხელშეკრულების ღირებულებად განისაზღვრა 122 968,61 ლარი, ხოლო მოქმედების ვადად – 2018 წლის 10 დეკემბერი.

4.4. მხარეთა შორის გაფორმებული 2018 წლის 6 ნოემბრის №174/1 ურთიერთშეთანხმების აქტით სამუშაოების შესრულების ვადა გაიზარდა 2018 წლის 20 ნოემბრის ჩათვლით.

4.5. მხარეთა შორის გაფორმებული № 174/2, № 174/3 და № 174/4 ურთიერთშეთანხმების აქტებით ხელშეკრულების მოქმედების ვადა, საბოლოოდ, გაიზარდა 2019 წლის 12 მარტამდე.

4.6. მიმწოდებელმა შეასრულა 75 984,63 ლარის ღირებულების სამუშაოები (სრული მოცულობის 62%), რაც დასტურდება ვანის მუნიციპალიტეტის მერიის ზედამხედველობის სამსახურის ხელმძღვანელის 2018 წლის 18 დეკემბრის №1390-20 და 2019 წლის 23 იანვრის №75-20 მოხსენებით ბარათებით.

4.7. მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები და ამოიწურა 2018 წლის 7 სექტემბრის № 174 სახელმწიფო შესყიდვის შესახებ ხელშეკრულების მოქმედების ვადა, ხოლო ვანის მუნიციპალიტეტის მერიის 2019 წლის 26 მარტის № 20350 ბრძანებით შპს „ლდ. გროუპს“ დაეკისრა პირგასამტეხლო 14 559,30 ლარის ოდენობით.

სამოტივაციო ნაწილი

5. შემაჯამებელი დასკვნა

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „ლდ. გროუპს“ უნდა მიეცეს გაფრთხილება.

6. გამოყენებული სამართლებრივი აქტები

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

7. სამართლებრივი შეფასება

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავედროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/ მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/ მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. მოცემულ შემთხვევაში, დგინდება, რომ მიმწოდებელმა არაჯეროვნად შეასრულა 2018 წლის 7 სექტემბრის №174 სახელმწიფო შესყიდვის შესახებ ხელშეკრულებით ნაკისრი ვალდებულებები. ამდენად, სახეზეა მიმწოდებლის გაფრთხილების ან შავ სიაში დარეგისტრირების წინაპირობა.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო,

საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტის თანახმად, გაფრთხილების შესახებ გადანყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი წერილობითი შეტყობინება სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს, მაგრამ პრეტენდენტის/მიმწოდებლის შავ სიაში დარეგისტრირებით დაირღვევა თანაზომიერების პრინციპი. გაფრთხილება გამოიყენება ერთხელ და მოქმედებს ერთი წლის განმავლობაში.


7.6. განსახილველ შემთხვევაში, სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოაღნიშნული წესის მე-3 და მე-4 მუხლებით განსაზღვრულ მოთხოვნებს. ამასთან, სააგენტო ითვალისწინებს მიმწოდებლის მიერ შესრულებული სამუშაოების ღირებულებას (სრული მოცულობის 62%). ამდენად, სააგენტო მიიჩნევს, რომ, ამ ეტაპზე, შპს „ლდ. გროუპის“ შავ სიაში დარეგისტრირებით დაირღვევა თანაზომიერების პრინციპი და მიზანშეწონილია მის მიმართ გაფრთხილების გამოყენება.

სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტით და დაადგინა:

- 1. შპს „ლდ. გროუპს“ (ს/ნ: 445469207) 2019 წლის 1 მაისს მიეცეს გაფრთხილება.
- 2. დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს სააგენტოს ვებგვერდზე შესაბამისი ჩანაწერის გაკეთება.
- 3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე